



JUDICIAL SYSTEM MONITORING PROGRAMME PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distrital Díli
4 Agostu 2017

Tribunál kondena tinan 28 prizaun ba krime violasaun seksuál ho natureza inestu

Iha 31 Jullu 2017, Tribunál Distrital Díli prezide julgamentu leitura akordaun no kondena arguidu MG ba pena prizaun tinan 28, tanba provadu komete krime violasaun seksuál hasoru nia oan fetu rasik, iha Distritu Likisá.

“Sentensa ne’e ekilíbriu ho arguidu nia hahalok no manifesta sentidu reijisaun maka’as ba kazu inestu iha ita nia sosiedade tanba inestu nu’udar forma krime ne’ebé la aseitavel no nunka bele hetan justifikasaun iha kualker sirkunstánsia,” dehan Luis de Oliveira Sampaio, Diretór Ezekutivu JSMP.

JSMP subliña dalabarak ona katak inestu nu’udar krime ida ne’ebé ofende teb-tebes valores sosiedade no nunka bele hetan fatin ho razaun saida deit tanba prejudika no afeita teb-tebes dezvoltamentu fíziku no psikolójiku lezada nian. Nu’udar kriatura-umanu ita nunka bele tolera krime no natureza hanesan ne’e.

JSMP observa katak maioria kazu inestu sira hetan sentensa ne’ebé todan. Mesmu nune’e, JSMP hanoin katak instituisaun relevante estadu nian tenke dezvoltave estratejia intervensaun ne’ebé komprensivu atu prevene inestu kontinua buras iha sosiedade. Partikularmente, JSMP insiste atu altera provizaun Kódigu Penál aktuál hodi defini esplisitamente “inestu” hanesan krime iha Kódigu Penál. Ida-ne’e sei ajuda ita instituisaun relevante sira no sosiedade atu dezvoltave estratéjia nasional ba prevensaun no hasae konsensia públuku kona-ba impaktu negativu hosi inestu no buka-tuir kauza prinsipal hosi inestu.

Iha kazu ne’e, Tribunál prova katak iha 18 Juñu 2010, wainhira lezada ba haris fatin arguidu tuir lezada ba haris fatin atu halo relasaun seksuál, maibé la konsege tanba lezada ninia maun VG dudu odamatan haris fatin nian, tanba ne’e arguidu la konsege realiza ninia asaun ne’e. Maibe antes ida-ne’e, maizumenus iha 4 Dezembru 2009, arguidu lori katana ameasa lezada hodi halo relasaun seksuál ho lezada.

Nune’e mós iha tinan 2005, wainhira arguidu ho lezada fila hosi to’os, arguidu lori katana ameasa lezada hodi halo relasaun seksuál ho lezada.

Tribunál konsidera faktus hotu provadu bazeia ba konfisaun arguidu nian, deklarasaun lezada nomós dokumentus iha autus laran. Aleinde ne’e arguidu mós deklarata katak relasaun seksuál ne’e loos akontese dala 8, la’os dala 3 hanesan iha akuzasaun. Arguidu deklarata no rekoñese katak so akontesementu ida iha haris fatin mak la konsege realiza.

Prokuradór akuza arguidu kontra artigu 172 Kódigu Penál kona-ba krime violasaun no artigu 173 alinea (a) Kódigu Penál kona-ba agravasaun no artigu 35 kona-ba krime iha konkursu konjuga mós ho artigu 2 no 35 alinea (b) Lei Kontra Violénsia Doméstika.

Depoide avalia fatos provadu sira ne'ebé prodús durante julgamentu Tribunál halo akumulasaun husi krime iha konkursu ne'ebé arguidu komete dala 7 ba krime violasaun seksuál no dala 1 ba krime tentativa violasaun seksuál hodi kondena arguidu ho pena prizaun tinan 28.

Depoide pronunsia tiha leitura akordaun, Tribunál mós imediatamente revoga kedas medida koasaun hosi TIR ba kedas prizaun preventiva, atu hein prosesu rekursu hosi defeza atu eveita la buka meius atu halo presau ka hamosu perigu ba lezada nia-vida tanba agora dadaun arguidu hela hamutuk hela ho lezada.

Kazu ne'e rejista iha Tribunál ho Nú. Prosesu: 0848/10.PDDIL. Julgamentu prezide hosi juis koletivu ne'ebé reprezenta hosi Dr. Antonio Helder do Carmo, Prokuradór reprezenta hosi Dr. Bartolomeu de Araújo no arguidu hetan Defeza hosi Dr. Marçal Mascarenhas hosi Defensória Públiku.

Atu hetan informasaun kle'an liután favór kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl